

ŠULSKE NOWINY



Serbska wyša šula Ralbicy

UNESCO projektna šula

www.sorbische-schule-ralbitz.de

Pražnik a žnjenc 2025

30. lětnik, 294. wudaće

Wučer, sportowc, Serb – Pětr Bejmak

poda so na wuměnk

Štóž mysli na našeho učerj, knjeza Pětra Bejmaka, zwjazuje mjeno z wotewrjenosću, angažementom a wysokej fachowej kompetencu. Jeho wosebita zamóžnosć je twarjenje mostow – k swojim šulerkam a šulerjam, k staršim abo k swojemu kolegijej. Při tym zamóže trěbnu chutnosć ze swojim typiskim humorom zwjazać. Nimo wuwučowanja angažowaše so knjez Bejmak



wjele lět jako fachowy poradźowar za sport. Ze swojej ekspertizu a swojim zapalom přinošowaše wón k wuwicu sportoweje učby a inspirěrowaše generacije šulerkow a šulerjow k sportowej zaběrje. Jeho wuspěchi na spartakiadach su dopokaz jeho talenta, młodžinu k najwyšim wukonam motiwować. Wukonowy sport njeje to jeničke, štož leži jemu na wutrobje. Organizowaše njeličomne sportowe swjedženje, tež ze zakładnej šulu, jara wobšěrnje. To běchu stajnje wjerški w šulskim lěće a skičachu wšitkim móžnosć, sportować a zhromadnje njezapomnite wokomiki dožiwić. Wažne zetkanišćo za šulsku zhromadnosć je wot knjeza Bejmaka do žiwjenja zwołany, kóždolětny adwentny wolejbulowy turněr. Wjeršk jeho karjery jako koparski trenar bě skutkowanje jako narodny trenar Italskeje (Cham 2006), Rumunskeje (Cham 2008) a Francoskeje (Budyšin 2010) we wubědźowanju „Šule hraja swětowe/europske mišterstwa“. Jeho rjadownje smědžachu so lěto wob lěto na originelne a njezapomnite pućowanske dny, rjadowniske jězby a wotchadnički wjeselić, hdžež mnoho nazhonichu a njezapomnite wokomiki



dožiwichu. Jako wučer geografije sposrědkowa knjez Bejmak wědu wo bliskej wokolinje, ale tež wo zdalenyh krajach a kulturach. Z tym puta wón svojich šulerkow a šulerjow a wotewri jim horiconty. Při tym so ženje njeboji, swoje kritiske měnjenje zastupować a k diskusiji pohnuwać. Tež ja smědžach wjele njezapomnitych wokomikow z knjezom Bejmakom dožiwić, wosebje w mnohich sněhakowarskich lěhwach. Tute jězby do hłuboko zasněženych Jizerskich horin, wot Šámaloveje Chaty přez Hřebínek a Kristiánov hač k Bílej kuchyně běchu husto wjace hač jenož sportowe zarjadowanja - wone běchu małe

dyrdomdeje, w kotrychž zhromadnje wužadanja zmištruwachmoj. Dopominam so hišće derje na wony sněhowy wichor, w kotrymž naju awće ze sněha wuswobodźachmoj - wokomik, kotryž naju na wosebite wašnje zwjazuje. Knjez Bejmak njesposrědkowa w lětach swojeho skutkowanja jenož wědu, ale tež hódnoty. Je generacije šulerkow a šulerjow inspirěrował, spěchował a po jich puću přewodźał. Swójske nazhonjenja dźěli rady w kolegiu. Luby knježe Bejmako, Waše skutkowanje na našej šuli zawostaji hłuboke slědy. Za wšitko, štož sće za našu šulu a nas wšitkich činili, prajimy džensa: Wutrobny džak! Přejemy Wam za dalši žiwjenski puć wšitko najlěpše, strowotu a dale wjele rjanych wokomikow.

- tekst: Michał Wornar, wobrazaj: archiw -

Dobre wukony docpěli

Pjatk, 23. róžownika 2025
wotmě so na našej šuli sportowy swjedźeń. Wosebitostka běše, zo šulerjo zakładneje a wyšeje šule zhromadnje sportowachu. Po zhromadnym sćoplenju podachmy so w skupinach, do kotryž rozdžělichu so šulerjo wot přenjeho do džewjateho



lětnika, na wšelake stacije. To běchu dalokoskok, 60-meterski sprint, mjetanje bulikow a wysokoskok. Nimo toho poskićachu so sportowe družiny kaž wolejbul, pjerkebulo abo kopańca. Při lóštnej a přewažnje serbskej hudźbje wšitcy hnydom dwójce tak derje sportowachu.

- tekst: Jakub Barč, wobraz: Jan Rjeda -

Politikarjo cyle blisko

Před krótkim wopytaštej rjadowni 9/1 a 9/2 Drježdźany, zo byštej sej tam zwjazkowy sejm wobhladali. Jako politikarjo njesmědźachmy tam džětać, ale dóstachmy wjedženje a móžachmy cyle blisko debaće scěhować. Mužoj a žony, kotřiž w našim zwjazkowym kraju knježa, diskutowachu a hadrowachu so mócnje. Prezident krajneho sejma dyrbyeše politiske strony samo stajnje zaso napominać, dokelž běchu přewótře. Tajka diskusija je woprawnjena, dokelž eksistuja za wobřečane temy zawěsće wjacore rozrisanja a kóžda frakcija chce so za swoju ideju zasadzić. Po debaće mějachmy krótki a jara přijomny interview z politikarku Elaine Jenčowej. Wona přisłuša k CDU a wotmołwi nam na prašenja kołowokoło powołanja politikarja. Z nowej wědu a mnoho nazhonjenjemi podachmy so zaso domoj.

- tekst: Milan Borška -

Wopyt w Budyskim krajnym sudnistwje

Srjedź meje wopytachu šulerki a šulerjo 8. lětnika Budyske krajne sudnistwo. Wězo dobrowólnje - bjez sudniskeho přeprošenja. Hromadže z wučerjomaj towaršnowědy, knjezom Kliemankom a knjezom Zahrodnikom, zetkach so šulerki a šulerjo na busowym zastanišću w Rakecach a podachu so do Budyšina. Hdyž tam dojděchu, kontrolowachu so wšitcy dokładnje - podobnje kaž na lětanišću. To bě hižo jara zajimawe. Po tym postrowi nas sudnik knjez Lucas. Před sudniskim procesom poda wón šulerkam a šulerjam dohlad do sudniskeho powołanja a předstaji sudniskej padaj, kotrejž so na tutym dnju wobjednawaštej. W prěnim padže džěše wo njekedźbliwego, młodeho kolesowarja, kiž bě ze swojim kolesom do awta prasnył. W druhim padže běštaj staršej mandźelskaj antikwity w online-awkciji jako inwesticiju kupiło. Tute pak su jenož

1/10 plaćeneje sumy hódne. Sudniskej jedhani wotměwaštej so w impozantnej žurli, tak mjenowanym „Schwurgerichtssaal“. Z wulkim zajimom a napjatosću sćěhowachu šulerki a šulerjo procesej. Sudnicy, zakitowarjo, skóržbnicy a wobskorženi běchu w cyłym procesu zapřijeći. Šulerki a šulerjo zhonichu při tym praktisce, štož běchu we wučbje wo ciwilnym procesu nawuknyli. Po 2,5 hodźinach skónči so jednanje. Wusud njeje so bohužel pobrachowacych posudkow dla hišće tworjeć móht. Za wšitkich wobdźělenych wostanje dale napjate. Wutrobny džak knjezej Lucasej, kiž je sej za nas čas wzał a swoje powołanje a padaj nadrobnje rozkładł. Po wopyće krajneho sudnistwa kupichu sej šulerki a šulerjo w měsće swój wobjed, prjedy hač so zaso wróćo do Ralbic podachu.

- tekst a wobraz: Mathias Kliemank -



Přejemy wšitkim šulerkam a šulerjam, wučerkam a wučerjam kaž tež wšěm, kotřiž na šuli džěłaja, wočerstwjace a slónčne prózdniny.



INFORMACIJE – TERMINY – WŠELČIZNY

wot 27. smažnika do 08. žnjenca
11. žnjenca
16. žnjenca

lěčne prózdniny
prěni šulski dzeń
socialny dzeń 9. lětnika

dalše grafiki - www.pixabay.de

